

南北史合注

欽定四庫全書

南北史合注卷八十八

明 李清撰

北史二

世祖大武皇帝諱燾明元皇帝長子母杜貴嬪天賜五

年北史東宮體貌姿異道武奇之曰成吾業者必此兒

也泰常七年四月封太平王五月立為皇太子及明元

帝疾命太子總攝百揆聰明大度意豁如也八月十一

月己巳明元帝崩壬申太子即皇帝位大赦十二月追尊皇妣為密皇太后進司徒長孫嵩爵為北平王司空奚斤為宜城王監田公長孫翰為平陽王其餘普增爵位各有差于是除禁錮釋嫌疑開倉庫賑窮乏河南流民相率內屬者甚衆

始光元年春正月丙寅定安王彌薨夏四月甲辰東巡幸大寧六月宋徐羨之弒其主義符秋七月車駕還宮八月柔然萬騎入雲中殺畧吏民政陷盛樂帝帥輕騎

討之虜乃退走九月大簡輿徒于東郊將北討冬十二月遣平陽王長孫翰等討柔然車騎次祚山柔然北遁諸軍追之大獲而還

是歲宋文帝元嘉元年

二年春正月己卯車駕至自北伐三月丙辰尊保母竇氏曰保太后丁巳以北平王長孫嵩為太守平陽王長孫翰為司徒宜城王奚斤為司空庾申營故東宮為萬壽宮起永安安樂二殿臨望觀九華堂初造新宇千餘

魏書載詔曰在昔帝軒命倉頡因鳥獸之跡以立文字自茲以降隨時改作篆隸草楷並行于世然時厯久遠傳習失真今文體錯謬會義不愜非所以示則來世也可制定文字世所用者頒下遠邇永為楷式夏四月詔龍驤將軍步堆使宋五月詔天下十家發大牛一頭運粟塞上秋八月夏赫連勃勃卒九月永安樂二殿成丁卯大饗以落之冬十月癸卯車駕北伐東西五道並出平陽王長孫翰絕漠追之柔然北走

三年春正月壬申車駕至自北伐秦乞伏熾盤遣使朝貢請討赫連昌二月起太學于城東祀孔子以顏回配夏五月辛卯進中山公纂爵為王復南安公素先爵常山王六月辛雲中舊宮謁陵廟西至五原田于陰山東至和堯山秋七月築馬射臺于長川帝親登臺觀走馬王公諸國君長馳射中者賜金錦繒絮各有差八月車駕還宮宋人來聘帝以夏赫連勃勃卒諸子相攻冬十月丁巳車駕西伐辛雲中臨君子津會天暴寒數日冰

合十一月戊寅率輕騎襲赫連昌壬午徙萬餘家而還  
至祚山班虜獲以賜將士各有差十二月詔奚斤西據  
長安秦隴氐羌皆叛昌詣斤降武都王楊玄及北涼沮  
渠蒙遜等使使內附

四年春正月乙酉車駕至自西伐賜留臺文武各有差  
徙民在道多死到者十六七己亥行幸幽州夏赫連昌  
遣其弟定向長安帝聞之遣就陰山伐木造攻具二月  
車駕還宮三月丙午詔金吾桓貸造橋于君子津丁丑

廣平王連薨夏四月丁未詔員外散騎常侍步堆使于  
宋五月車駕西攻夏赫連昌次拔隣山築城舍輜重以  
輕騎三萬先行戊戌至黑水帝親祈天告祖宗之靈而  
誓衆六月癸卯朔日有蝕之甲辰大破昌昌奔上邽乙  
巳車駕入城擄昌羣弟及其母妹妻妾宮人萬數府庫  
珍寶車旗器物不可勝計

魏書曰獲馬三十餘萬匹牛羊數千萬

辛酉班師留常山王素執金吾桓貸鎮統萬秋七月己



郊築壇于祚嶺戲馬馳射賜中者金帛繒絮各有差柔  
然寇雲中間破赫連昌懼而逃八月壬子車駕至自西  
伐飲至策勲告宗廟班軍實以賜留臺百寮各有差冬  
十一月以氏王楊玄為假征南大將軍都督梁州刺史  
南秦王十二月行幸中山守宰貪汙免者十數人癸卯  
車駕還宮復所過田租之半

神麤元年春正月以天下守令多非法精選忠良悉代  
之辛未京兆王黎亮二月改元司空奚斤進軍安定監

軍侍御史安頡出戰禽夏王昌其餘衆立昌弟定為主  
走還平涼三月辛巳侍中古弼送赫連昌至京師司空  
奚斤追赫連定于平涼馬髦嶺為定所擒將軍丘堆先  
在安定聞斤敗東走長安帝大怒詔頡令斬之夏四月  
夏赫連定遣使來聘帝詔諭之壬子西巡戊午帝田于  
河西大赦南秦王楊玄遣使朝貢五月秦乞伏熾盤卒  
六月行幸長川秋七月還宮八月東幸廣寧臨觀溫泉  
以太牢祭黃帝堯舜廟九月還宮冬十月田于牛川是

月還宮十一月乙未朔日有蝕之是月行幸河西大校獵十二月甲申還宮

二年夏四月宋人來聘庚寅車駕北伐五月丁未次于沙漠舍輜重輕騎兼馬至粟水柔然震怖焚廬舍絕跡西走冬十月振旅凱旋于京師告于宗廟列置新人于漠南東至蠕源西暨五原陰山竟二千里十一月西巡田于河西至祚山而還

三年春正月庚子車駕還宮壬寅大赦癸卯行幸廣甯

臨溫泉作溫泉歌二月丁卯司徒平陽王長孫翰薨戊辰車駕還宮壬寅大赦進會稽公赫連昌為秦王夏四月甲子行幸雲中勅勅萬餘落叛走詔尚書封鐵

魏書封鐵作劉潔

追滅之五月戊午論討勅勅功大明賞罰

魏書載詔曰夫士之為行在家必孝處朝必忠然後身榮于時名揚後世近遣尚書封鐵剪除亡命其所部將士有盡忠竭節以殞軀命者今皆追贈爵號或

欽定四庫全書

卷八十八

有蹈鋒鏑履難以自効者以功次進位或有故違軍法私離幢校者以軍法行戮夫有功蒙賞有罪受誅國之常典不可暫廢其宣勅內外咸使聞知

秋七月己亥詔諸征鎮將軍王公杖節邊遠者聽開府辟召其次增置吏員庾子詔大鴻臚卿杜超假節都督冀定相三州諸軍事行征南大將軍太宰進爵為王鎮鄴為諸軍節度八月宋將到彥之自清水入河汴河西行丙寅彥之遣將度河攻冶坂冠軍將軍安頡督諸軍

大破之九月癸卯立密太后廟于鄴甲子行幸統萬遂  
征平涼是月燕馮跋卒弟弘殺其太子自立冬十月乙  
卯冠軍將軍安頡濟河攻洛陽丙子拔之辛巳安頡平  
虎牢十一月巳酉車駕至平涼巳亥行幸安平庚子帝  
自安定還臨平涼遂掘塹固守之行幸紐城安慰初附  
赦秦隴之人賜復七年辛酉安頡帥諸軍攻滑臺北涼  
沮渠蒙遜遣使朝貢壬寅封壽光侯叔孫建為丹陽王  
十二月丁卯夏赫連定弟社于度洛孤面縛出降平涼

平收其珍寶定長安臨晉武功守將皆奔走關中平士  
申車駕東還但留巴東公延普等鎮安定

四年春正月壬午車駕次木根山大饗羣臣丙申宋將  
檀道濟王仲德從清水至滑臺丹陽王叔孫建汝陰公  
長孫道生拒之道濟不敢進是月夏赫連定滅秦乞伏  
慕末二月辛酉安頡司馬楚之平滑臺癸酉車駕還宮  
飲至策勲告于宗廟賜留臺百官各有差戰士賜復十  
年定州民饑詔開倉賑之宋將檀道濟王仲德東走三

月庚戌冠軍將軍安頡獻宋將萬餘人甲兵三萬夏六月夏赫連定北襲沮渠蒙遜為吐谷渾慕璿所執閏月乙未柔然遣使朝貢詔散騎侍郎周紹使于宋秋七月己酉行幸河西起承華宮八月乙酉涼沮渠蒙遜遣子安周入侍吐谷渾慕璿遣使奉表請送赫連定己丑以慕璿為大將軍封西秦王九月癸丑車駕還宮庚申加太尉長孫嵩柱國大將軍以左光祿大夫崔浩為司徒征西大將軍長孫道生為司空癸亥詔兼太常李順持



節拜河西王沮渠蒙遜為假節加侍中都督涼州持節  
及西域羌戎諸軍事行征西大將軍太傅涼州牧涼王  
士申詔曰

冊府元龜載詔一段 頃逆命縱逸戎車屢駕今二  
寇推珍方將偃武修文理廢職舉逸民拔幽延雋昧  
旦思求師輔

范陽盧玄博陵崔綽趙郡李靈河間邢穎渤海高允廣  
平游雅太原張偉等皆賢雋之胄冠冕州邦有羽儀之

用易曰我有好爵吾與爾縻之如玄之比隱跡衡門下  
曜名譽者盡勅州郡以禮發遣遂徵玄等州郡所遣至  
者數百人皆差次序用冬十月戊寅詔司徒崔浩改律  
令行幸漠南十一月丙辰北部勅勒莫弗庫若干率其  
部數萬騎驅鹿獸數百萬詣行在所帝因而大狩以賜  
從者勒石漠南以紀功德宜城王奚斤坐事降爵為公  
十二月車駕還宮

延和元年春正月丙午尊保太后為皇太后立皇后赫

連氏以皇子晃為皇太子謁于太廟大赦改元

魏書載已巳詔修廢官舉雋逸蠲除煩苛更定科制  
務從儉約

三月丁未追贈夫人賀氏為皇后壬申西秦王吐谷渾  
慕瓚送赫連定于京師夏五月宋人來聘六月庚寅車  
駕伐燕馮弘詔尚書左僕射安原等屯于漠南以備柔  
然辛卯詔兼散騎常侍鄧穎使于宋秋七月己巳車駕  
至和龍穿塹守之是月築東宮九月己卯車駕西還徙

頻年屢征有事西北運輸之役百姓勤勞妨失農業  
遭罹水旱致使貧富不均未得家給人足或寒窮不  
能自贍朕甚閔焉今兵革漸寧宜寬徭賦與民休息  
富者如常中戶改復刺史守宰當務公平不得阿容  
辛卯車駕還宮三月甲寅行幸河西閏月甲戌秦王赫  
連昌叛走河西候將格殺之驗其謀反羣弟皆伏誅已  
卯車駕還宮進彭城公粟爵為王四月丁未行幸河西  
六月還宮秋七月辛巳東宮戒備置屯衛三分西宮之

一壬午行幸美稷遂至隰城命諸軍討山胡白龍于河西九月戊子尅之斬白龍及其將帥屠其城冬十一月車駕還宮十二月甲辰行幸雲中

太延元年春正月乙未朔日有蝕之壬午降死罪刑已下各一等癸未出道武明元宮人令得嫁甲申大赦改元

冊府元龜載是年詔曰勸農平賦宰民所專急盡力三時黎元所克濟自今以後郡縣不得妄遣吏卒攬

擾民庶若有調發縣宰集三老計資定課裒多益寡  
不得縱富督貧避強侵弱牧守苟治民之任當揚化  
順典與國同憂直道正身肅居官次不亦可乎

二月庚子詔長安及平涼人徙在京師其孤老不能自  
存者聽還鄉里丁未車駕還宮夏五月庚申集宜都公  
穆壽為宜都王汝陰公長孫道生為上黨王宜城公奚  
斤為恒農王廣陵公屢伏連為廣陵王遣使者二十輩  
使西域甲戌行幸雲中六月甲午詔曰去春小旱東作

不茂憂勤尅已祈請靈祇豈朕精誠有感何報應之速  
雲雨震洒流澤霑渥有鄙婦人持方寸玉印詣潞縣侯  
孫家既而亡去莫知所在印有三字為龍鳥之形要妙  
奇巧不類人迹文曰旱疫平推尋其理蓋神靈之報應  
也比者以來禎瑞仍臻甘露流液降于殿內嘉瓜合蒂  
生于中山野木連理植于魏郡在先后載誕之鄉白鷺  
集于盛樂舊都玄鳥隨之蓋有千數嘉禾頻歲合秀于  
恒農白兔並見渤海白雉三隻又集于平陽太祖之廟

天降嘉貺將何德以酬之其令天下大酺五日禮報百  
神守宰祭域內名山大川上答天意丙午秋七月田于  
柘陽己卯樂平王丕等五將東伐至燕和龍徙男女六  
千口而還八月丙戌行幸河西九月車駕還宮冬十月  
癸卯尚書左僕射安原謀反伏誅甲辰行幸定州次于  
新城宮十一月己巳校獵于廣川丙子行幸鄴祀密太  
后廟諸所過親問高年褒禮賢俊十二月癸卯遣使者  
以太牢祀北岳是年柔然果持馬耆車師高麗鄯善等



國並遣使朝貢

水經注載是月車駕東巡至廣昌嶺嶺高四十餘里  
帝停道側援弓射之飛矢踰岩後立御射碑

二年春正月甲寅車駕還宮二月戊子燕馮弘遣使朝  
貢來送侍子帝不許壬辰遣使十餘輩詣高麗東夷諸  
國詔喻之三月丙辰宋人來聘辛未遣平東將軍姚清  
安西將軍古弼討燕馮弘弘求救于高麗高麗遣其大  
將葛蔓盧迎之夏四月甲寅皇子小兒苗兒並薨五月

乙卯燕王馮弘奔高麗戊午詔散騎常侍封撥使高麗  
徵送馮弘丁卯行幸河西赫連定之西也楊難當竊據  
上邽秋七月庚戌命樂平王丕等討之詔散騎常侍游  
雅使于宋八月丁亥遣使六輩使西域帝校獵于河西  
詔廣平王張黎發定州七郡一萬二千人通莎泉道甲  
辰九月庚戌樂平王丕等至畧楊難當奉詔攝上邽守  
高麗不送馮弘帝將伐之納樂平王丕計而止冬十一  
月己酉幸桐陽驅野馬于雲中置野馬苑閏月壬子車

駕還宮乙丑改封潁川王提為武昌王河西沮渠渠牧  
捷遣使朝貢是歲吐谷渾慕瑣死沙車國遣使朝貢

三年春正月癸未中山王纂薨戊子太尉北平王長孫嵩  
薨乙巳丹陽王叔孫建薨二月乙卯行幸幽州存恤孤  
老問民疾苦還幸上谷遂至代所過復田租之半三月  
己卯車駕還宮丁酉宋人來聘夏五月己丑詔天下吏  
民得舉告守宰不如法者丙申行幸雲中秋七月戊子  
使永昌王健上黨王長孫道生討山胡白龍餘黨于河

西滅之八月甲辰行幸河西九月甲申車駕還宮丁酉遣使者拜西秦王慕璿弟慕利延為鎮西大將軍儀同三司改封西平王冬十月癸卯行幸雲中十一月壬申車駕還宮是歲北涼王沮渠牧犍世子封壇來朝高麗契丹龜茲悅服焉耆車師粟特疏勒烏孫渴盤陁鄯善破落者舌等國各遣使朝貢

四年春三月庚辰鄯善王弟素延耆來朝癸未罷沙門年五十以下江陽王根薨是月高麗殺故燕王馮弘夏

五月戊寅大赦秋七月壬申車駕北伐冬十一月丁卯朔日有蝕之十二月車駕至自北伐上洛巴泉輩等相率內附詔兼散騎常侍高雅使于宋

五年春正月庚寅行幸定州三月辛未車駕還宮庚寅以故南秦王世子楊保宗為征南大將軍秦州牧武都王鎮上邽夏五月癸未遮逸國獻汗血馬六月甲辰車駕西伐涼沮渠牧犍侍中宜都王穆壽轉輔皇太子決留臺事大將軍長樂王稽敬輔國大將軍建寧王崇二

萬人屯南漠以備柔然秋七月己巳車駕至上都屬國  
城大饗羣臣講武馬射壬午留輜重分部諸軍八月丙  
申車駕至姑藏牧犍兄子祖踰城來降乃分軍圍之九  
月丙戌涼牧犍與左右文武五千人面縛軍門帝解之  
縛待以藩臣之禮牧其城內戶口二十餘萬倉庫珍寶  
不可稱計進張掖公禿髮保周爵為王與龍驤將軍穆  
熊安遠將軍源駕分畧諸郡牧犍弟張掖太守宜得西  
奔酒泉與太守無諱復奔晉陽樂都太守安周南奔吐

谷渾戍子柔然犯界遂至七界山京都大駭皇太子命  
上黨王長孫道生等拒之冬十月辛酉車駕還宮徙涼  
州人三萬餘家于京師留樂平王丕征西將軍賀多羅  
鎮涼州癸亥遣張掖王禿髮保周喻諸部鮮卑保周因  
率諸部叛于張掖十一月乙巳宋人來聘并獻馴象一  
十二月壬午車駕至自西伐飲至策勲告于宗廟楊難  
當寇上邽鎮將元勿頭討走之是歲鄯善龜茲踈勒焉  
耆高麗粟特渴盤陀破那悉半居等國並遣使朝貢

太平真君元年正月己酉沮渠無諱圖酒泉辛亥分遣  
侍臣巡行州郡觀察風俗問民疾苦二月己巳詔假通  
直常侍邢穎使于宋發長安人五千浚昆明池

魏書靈徵志載是月有黑風竟天廣五丈餘

三月酒泉陷夏四月戊午朔日有蝕之庚辰沮渠無諱  
寇張掖禿髮保周屯刪丹

魏書載丙戌詔撫軍永昌王健等督諸軍討保周

五月辛卯行幸北部丙辰車駕還宮六月丁丑皇孫濬



生大赦改元秋七月行幸陰山己丑永昌王健大破禿  
髮保周走之丙申保太后竇氏殂于行宮癸丑保周自  
殺傳首京師八月甲申沮渠無諱降九月壬寅車駕還  
宮冬十一月丁丑行幸山北十二月還宮是歲州鎮十  
五饑詔開倉賑恤以河間王曜子羯兒為河間王後改  
封畧陽王

二年春正月癸卯拜沮渠無諱為征南大將軍涼州牧  
酒泉王甲辰行幸溫泉二月還宮三月辛卯葬惠太后

于崱山庚戌新興王俊畧陽王羯兒有罪黜為公辛亥  
封柔然郁久閭乞歸

魏書作及列歸

為朔方王沮渠萬年為張掖王夏四月丁巳宋人來聘  
五月辛卯行幸山北秋八月辛亥詔散騎侍郎張偉使  
于宋行幸河西九月戊戌永昌王健薨冬十一月庚子  
鎮南大將軍奚眷平酒泉十二月甲戌車駕還宮丙子  
宋人來聘

三年春正月甲申帝至道壇親受符籙備法駕旗幟盡  
青三月壬寅北平王長孫頽有罪削職為侯夏四月酒  
泉王沮渠無諱走度流沙據鄯善李暉孫寶據敦煌遣  
使內附五月行幸陰山北閏月南秦王楊難當為宋所  
敗奔上邽六月丙戌難當朝于行宮先是起殿于陰山  
北殿成而難當至因曰廣德焉秋七月詔討仇池八月  
甲戌晦日有蝕之冬十月己卯封皇子伏羅為晉王翰  
為秦王譚為燕王建為楚王余為吳王十二月己巳太

保襄城公盧魯元卒丁酉車駕還宮李寶遣伏朝貢以  
寶為鎮西大將軍開府儀同三司沙州牧敦煌公

四年春正月庚午行幸中山二月丙子次于恒山之陽  
詔有司刊石勒銘是月剋仇池三月庚申車駕還宮夏  
四月武都王楊保宗謀反諸將擒送京師氏羌復推保  
宗弟文德為主圍仇池六月詔復民貲賦三年其田租  
歲輸如常牧守不得妄有徵發違者有司彈糾勿縱癸  
巳大閱于西郊九月辛丑行幸漠南甲辰拾輜重以輕

騎襲柔然分軍為四道冬十一月甲子車駕還至朔方  
詔曰朕平暴除亂二十年矣夫陰陽有往復四時有代  
謝授子任賢古今令典其令皇太子副理萬幾總統百  
揆諸功臣勤勞日久皆當以爵歸第隨時朝請饗宴朕  
前論道陳謨而已不宜復煩以劇職更舉賢俊以備百  
官明為科制以稱朕心十二月辛卯車駕至自北伐  
五年春正月壬寅皇太子始總百揆侍中中書監宜都  
王穆壽司徒東都公崔浩侍中廣平公張黎侍中建興

公古弼輔太子以決庶政諸上書者皆稱臣上疏儀與  
表同戊申詔自王公已下至庶人私養沙門巫及金銀  
工巧之人在其家者皆遣詣官曹限今年二月十五日  
過期不出巫沙門身死主人門誅庚戌詔自三月以下  
至鄉士其子息皆詣太學其百工伎巧驕卒子息當習  
父兄所業不聽私立學校違者師身死主人門誅二月  
辛未中山王辰等八人以北伐後期斬于都南癸酉樂  
平王丕薨庚辰行幸廬

魏書靈徵志曰真君五年二月張掖郡上書往曹氏  
之世邱池縣大柳谷山石表龍馬之形石馬脊文曰  
大討曹氏而晉氏代魏今石文記國家祖宗諱著受  
命之符乃遣使圖寫其文大石有五皆青質白章成  
文字其二石記張呂已然之効其三石記國家祖宗  
至今其文記昭成皇帝諱繼世四六天法平天下大  
安凡十四字次記太祖道武皇帝諱應王載記千歲  
凡七字次記太宗明元皇帝諱長子二百二十年凡

八字次記太平天王繼世主治凡八字次記皇太子  
諱昌封太山凡五字初帝封太平王天文圖錄又受  
太平真君之號與石文相應太宗名諱後有一人象  
携一小兒見者皆曰帝愛皇孫提携卧起不離左右  
此即上象靈契

三月戊辰大會于鄒南遣使者四輩使西域甲辰車駕  
還宮夏四月乙亥太宰陽平王杜超為帳下所殺五月  
丁酉行幸陰山北六月西平王吐谷渾慕利延殺其兄



子緯代立緯弟叱力延等來奔乞師以叱力延為歸義  
王秋八月乙丑田于河西壬午詔員外散騎常侍高濟  
使于宋九月帝自河西至馬邑觀于崞川己亥車駕還  
宮丁未行幸漠南冬十月癸未晉王伏羅大破慕利延  
走奔白蘭其部一萬三千內附十一月宋人來聘十二  
月丙戌車駕還宮是歲粟特國遣使朝貢

六年春正月辛亥幸定州引見長老存問之詔兼員外  
散騎常侍宋惜使于宋二月遂西幸上黨觀連理樹于

玄氏至吐京討徙叛胡出配郡縣焉三月庚申車駕還  
宮詔諸有疑獄皆付中書以經義量決夏六月戊子朔  
日有蝕之壬辰北巡秋八月壬辰散騎常侍成周公萬  
度歸以輕騎至鄯善執其王真達與詣京師帝大悅厚  
待之車駕幸陰山北次于廣德王詔發境內兵三取一  
各當戒嚴以須後命徙諸種雜人五千餘家于北邊令  
民北徙畜牧至廣漠以餌柔然壬寅征西大將軍高涼  
王那等討吐谷渾慕利延軍到曼頭城慕利延驅其部

落西度流沙那急追故西秦王慕瓚子被囊逆軍拒戰  
那擊破之中山公杜豐追度三危至雪山擒被囊及慕  
利延兄子什歸乞伏熾盤子成龍送京師慕利延遂西  
入于闐國九月廬水胡蓋吳聚衆反于杏城冬十一月  
高涼王那振旋還京師庚申遼東王竇漏頭薨河東蜀  
薛永宗聚黨入汾曲西道蓋吳受其位號蓋吳自號天  
台王署百官辛未車駕還宮選六州兵勇猛者使永昌  
王仁高涼王那分領為二道南畧淮泗以北徙青徐之

人實河南癸未西巡

七月春正月戊辰車駕次東雍禽薛永宗斬之其男女  
無少長皆赴水死辛未南幸汾陰蓋吳退走北地二月  
丙戌幸長安存問父老丁亥幸昆明池遂田于岐山之  
陽所過誅與蓋吳通謀反害守將者三月詔諸州坑沙  
門毀諸佛像

魏書釋老志曰帝與崔浩皆信寇讎之道浩尤不信  
佛數加非毀常謂虛誕為世賈害帝以其辨博頗信

之會蓋吳反杏城關中騷動帝西伐至長安寺內沙  
門飲從官酒入其便室見有弓矢矛楯帝怒曰此非  
沙門所用當與蓋吳通謀規害人耳命有司案誅一  
寺閱其財產大得釀酒具及州郡牧守富人所寄藏  
物以萬計又為窟室與貴室女私淫帝忿沙門非法  
浩時從行因進其說詔誅長安沙門毀破佛像勅留  
臺下四方一依長安行事又詔自王公以下有私養  
沙門者皆送官曹限今年二月十五日不出沙門身

死容止者門誅時景穆為太子監國素敬佛道頻來  
陳殺沙門之濫又非圖像罪今罷其道杜諸寺門世  
不脩奉自然毀滅如是再三不允乃下詔曰昔後漢  
荒君信惑邪偽妄假睡夢以亂天常夸誕大言後世  
眩焉由是政教不行禮義大壞五服之內鞠為邱墟  
朕除偽定真滅其蹤跡自今以後敢有事胡神及造  
泥人銅人者門誅有非常之人乃能行非常之事非  
朕孰能去此歷代偽物有司其宣告州郡諸軍刺史

諸有佛像胡書皆擊破焚燒沙門無少長悉坑之雖不用太子言然猶緩宣詔遠近皆豫聞得各為計四方沙門多亡匿在京邑者亦蒙全濟金銀寶像及諸經論大得秘藏而土木宮塔聲教所及莫不畢毀矣徙長安城內工巧二千家于京師夏四月甲申車駕至自長安戊子毀鄴城五層佛圖於泥像中得玉璽二其文皆曰受命于天既壽永昌其一刻其旁曰魏所受漢傳國璽五月蓋吳復聚杏城自號秦地王丙戌發司幽

定冀四州十萬人築畿上塞圖起上谷西至于河廣袤  
皆千里六月癸未朔日有蝕之秋八月蓋吳為其下人  
所殺傳授京師復畧陽公羯兒王爵

八年春正月癸未行幸中山三月河西王沮渠牧犍坐  
罪賜死徙定州丁零三千家于京師夏五月車駕還宮  
六月西征諸將扶風公處等八將坐盜沒軍資所在擄  
掠賊各千萬計並斬之秋八月樂安王範薨冬十一月  
侍中中書監宜都王穆壽薨十二月晉王伏羅薨



九年春正月宋人來聘二月癸卯行幸定州山東民饑  
詔開倉賑之罷塞園作遂西幸上黨詔于壺關東北大  
王山累石為三封又斬其鳳凰山南足以斷之三月車  
駕還宮五月甲戌以交趾公韓拔為假征西將軍領護  
西戎校尉鄯善王鎮鄯善賦役其民北之郡縣六月辛  
酉行幸廣德宮丁卯悅般國遣使求與王師俱討柔然  
帝許之秋八月詔中外諸軍戒嚴九月乙酉練兵于西  
郊丙戌幸陰山是月成周公萬度歸千里驛上大破焉

耆國其王鳩尸卑邠奔龜茲冬十月辛丑恒農王奚斤  
薨癸卯以婚姻奢靡喪葬過度詔有司更為科限癸亥  
大赦十二月詔成周公萬度歸自焉支西討龜茲皇太  
子朝于行宮遂從北討至受降城不見柔然因積糧城  
內留守而還北平王長孫敦坐事降爵為公

十年春正月戊辰朔帝在漠南大饗百寮甲戌柔然吐  
賀真懼遠遁三月蒐于河西庚寅車駕還宮夏四月丙  
申朔日有蝕之五月庚行行幸陰山九月閱武于磧山

遂北伐冬十月庚子皇太子及羣官奉迎于行宮十二月戊申車駕至自北伐已酉以平昌公託真為中山王是歲浮圖沙國及龜茲疏勒破落那員闌諸國並遣使朝貢

十一年春正月乙丑行幸洛陽所過郡國皆親對高年存恤孤寡二月甲午大蒐于梁州皇子真薨是月大脩宮室皇太子居于北宮車駕遂征懸瓠夏四月癸卯車駕還宮賜從者及留臺郎吏已上生口各有差六月己

亥殺司徒崔浩辛丑北巡陰山秋七月宋將王玄謨攻  
滑臺八月辛亥田于河西癸未練兵于西郊九月辛卯  
車駕南伐癸巳皇太子北伐屯于漠南吳王余留京師  
都庾子曲赦定冀相三州死罪已下冬十月己丑車駕  
濟河玄謨棄軍而走乃命諸軍分道並進車駕自中道  
宋書索虜傳曰見秦始皇石刻使人排仆之

使使者以太牢祭孔子是月頗盾國獻獅子十二月丁  
卯車駕至淮詔刈崔韋作筏數萬而濟

魏書島夷傳曰高涼王那出山陽永昌王仁于壽陽  
出橫江凡所經過莫不風靡

癸未車駕臨江起行宮于瓜步山諸軍皆臨江

魏書天象志曰騎士六十萬列屯三千餘里 又島

夷傳曰義隆大懼欲走吳會疑史臣甚辭

其降附者不可勝數甲申宋文帝使獻百牢貢其方物  
又請進女於皇孫以求和好帝以師婚非禮許和而不  
許婚

按宋書魏書皆以魏請婚結親言不許婚者諉辭也  
當從宋書

使散騎侍郎夏侯野報之帝詔皇孫為書致馬通問

正平元年春正月丙戌朔大會羣臣于江上文武受爵  
者二百餘人丁亥車駕北旋二月癸未次魯口皇太子  
朝于行宮三月己亥車駕至自南伐飲至策勲告于宗  
廟以降人五萬餘家分置近畿賜留臺文武所獲軍資  
生口各有差夏五月壬寅大赦六月壬戌改元車師國

王遣子入侍詔以刑網太密犯者更衆命有司其案律  
令務求厥中其餘有不便于人者依此增損詔太子少  
傅游雅中書侍郎胡方回等改定律制畧陽王羯兒高  
涼王邠有罪賜死戊辰皇太子薨壬申葬景穆太子于  
金陵秋七月丁亥行幸陰山省諸曹吏員三分之一九  
月癸巳車駕還宮冬十月庚申行幸陰山宋人來聘詔  
殿中將軍郎法祐使於宋己巳司空上黨王長孫道生  
薨十二月丁丑車駕還宮封皇孫濬為高陽王尋以皇

孫世嫡不宜在藩乃止改封秦王翰為東平王燕王譚  
為臨淮王楚王建為廣陽王吳王余為南安王是歲破  
落那蜀賓迷密諸國皆遣使朝貢

二年春正月庚辰朔南來降人五千餘家于中山謀叛  
州軍討平之冀州刺史張掖王沮渠萬年與降人通謀  
賜死三月中常侍宗愛弒帝帝崩于永安宮時年四十  
五秘不發喪愛又矯皇后令殺東平王翰迎南安王余  
立之大赦改元為承平尊謚曰太武皇帝葬金陵雲中



廟號世祖帝生不逮密太后及有所識言則悲慟哀感  
傍人明元聞而嘉歎及明元不豫衣不釋帶性清儉率  
素服御飲膳取給而已不好珍麗食不二味所幸昭儀  
貴人衣無兼綵羣臣白帝峻京邑城隍從周易設險之  
義又陳蕭何壯麗之色帝曰古人有言在德不在險屈  
丐蒸土築城而朕滅之豈在城也今天下未平方須民  
力土功之事朕所未為蕭何之對非雅言也每以財者  
軍國之本無所輕費至于賞賜皆勲績之家親戚愛寵

未嘗橫及臨敵常與士卒同在矢石間左右死傷相繼  
帝神色自若是以人思効命所向無前命將出師指授  
節度從命者無不制勝違與者率多敗失

本史陸侯傳曰安定盧永劉超等叛帝命侯往鎮長  
安諭之曰超等恃險不順王命若以重兵與卿則超  
等必合為一據險拒戰若以輕兵與卿則不制矣今  
使卿以方畧定之侯單馬之鎮卒以計平超等 魏  
書劉潔傳曰勅勅新民苦將吏侵漁咸出怨言潔與

安原奏請及河水未解徙之河西庶水解不得度走  
帝曰此等習俗放散日久似園中鹿急則衝突緩則  
定吾處之有道不煩徙也潔等固執乃定徙二萬餘  
落于河西新民果驚駭北走饑死者枕籍

性又知人拔士於卒伍唯才所長不論本末兼甚嚴斷  
明于刑賞功者賞不遺賤罪者刑不避親雖寵愛之終  
不虧法常曰法者朕與天下同之何敢輕也故大臣犯  
法無所寬假雅善聽察瞬息間下無以措其姦隱然果

于誅戮後多悔之

愚按此宋人進魏書表所以稱太武暴戾過聰虎也  
當以族崔浩與南伐不禁殺戮當之其他赦高允之  
死容古弼歐劉樹之狂直又非道武可及乃槩以暴  
戾過矣

高宗文成皇帝諱濬景穆皇帝長子母曰閭氏真君元  
年六月生于東宮高宗少聰達太武長置左右號世嫡  
皇孫年五歲太武北巡高宗從在後逢虜帥桎一奴將

加罰高宗謂奴今遭我汝宜釋之帥奉命解縛太武聞之曰此兒雖小欲以天子自處意奇之及長風格異常每叅決大政可否正平二年三月中常侍宗愛弒逆立南安王余十月丙午又賊余于是殿中尚書長孫渴侯與尚書陸麗奉迎世嫡皇孫

興安元年冬十月戊申皇孫即位于永安前殿大赦改正平二年為興安以驃騎大將軍元壽樂為大宰都督中外諸軍錄尚書事以尚書長孫渴侯為尚書令儀同

三司十一月丙子二人爭權並賜死癸未廣陽王建臨  
淮王譚薨甲申皇妣閻氏崩進平南將軍宋子侯周怛  
爵為樂陵王南部尚書常安子陸麗為平原王文武各  
加位一等壬寅追尊皇考景穆太子為景穆皇帝妣閻  
氏為恭皇后尊保母常氏為保太后十二月戊申祔葬  
恭皇后于金陵乙卯初復佛法

冊府元龜載詔曰夫為帝王者必祇奉明靈顯彰二  
道擇迦如來功濟大千惠流塵境排斥羣邪開演正

覺前代迄今莫不崇尚世祖太武皇帝開廣邊荒德澤遐及沙門道士風義相感往往如林但山海之深怪物多有是以先朝因其瑕釁戮其有罪有司失旨一切斷禁景穆皇帝每為慨然軍國多事未遑脩復朕承洪緒思述先志今制諸州郡縣于衆居之所各聽建佛圖一區魏書釋老志又曰其好樂道欲為沙門者不問長幼聽其出家是時天下承風朝不及夕往時所毀佛寺仍還修矣佛像經論皆復得顯又

曰僧曇曜以復佛法之明年自中山被命赴京帝奉以師禮後奏平齊戶及諸民有能歲輸穀六十斛入僧曹者即為僧祇戶粟為僧祇粟遇儉歲賑饑又請民犯重罪及官奴以為佛圖戶供諸寺洒掃歲兼營田輸粟高宗並許之于是僧祇戶粟及寺戶徧于州鎮

愚按平齊在顯祖時高祖恐誤

丁巳以樂陵周怵為太尉平原王陸麗為司徒鎮西將軍杜元寶為司空戊寅進建業公陸侯爵為東平王進



廣平公杜遺爵為王癸亥詔以營州蝗開倉賑恤甲子  
太尉樂陵王周怱有罪賜死進濮陽公閭若文爵為王  
是歲保達沙獵等國遣使朝貢

二年春正月辛巳進司空杜元寶爵為京兆王廣平王  
杜遺薨進尚書僕射東安公劉尼爵為王封建寧王崇  
子麗為濟南王癸未詔與百姓雜調十五丙戌進尚書  
西平公源賀爵為王二月己未司空京兆王杜元寶謀  
反伏誅建寧王崇崇子濟南王麗為元寶所引各賜死

乙丑發京師五千人穿天泉池是月宋太子劬弒文帝  
三月尊保太后為皇太后進安豐公閭武皮爵為河間  
王夏五月宋孝武帝討誅太子劬而自立閏月乙亥太  
皇太后赫連氏崩秋七月辛亥行幸陰山濮陽王閭若  
文永昌王仁謀反乙卯仁賜死若文伏誅己巳車駕還  
宮是月築馬射臺于南郊八月戊戌詔曰朕即位以來  
風雨順序邊方無事衆瑞兼呈又于苑內獲方寸玉印  
其文曰子孫長壽羣公卿士咸曰休哉豈朕一人克臻

斯應實由天地祖宗降祐所致也思與兆庶共茲嘉慶  
其令百姓大酺三日降殊死已下囚九月壬子閱武于  
南郊冬十一月辛酉行幸信都中山觀察風俗十二月  
甲午車駕還宮復北平公長孫敦王爵是歲踈勒渴盤  
陀庫莫奚契丹罽賓等國各遣使朝貢

興光元年春正月乙丑以侍中河南公伊藺為司空二  
月甲午帝至道壇受圖籙禮畢曲赦京師夏六月行幸  
陰山秋七月丙申朔日有蝕之庚子皇子弘生辛丑大

赦改元八月甲戌趙王深薨乙亥車駕還宮乙丑皇叔  
武頭龍頭薨九月庫莫奚國獻名馬有一角狀如麟閉  
都門大索三日獲奸人亡命數百人

冊府元龜載是秋勅有司于五級大寺內為太祖已  
下五帝鑄釋迦立像五各長一丈六尺用赤金二十  
五萬斤

冬十一月戊戌行幸中山遂幸信都都邑十二月丙子  
還幸靈丘至溫泉宮庚辰車駕還宮出于叱萬單等國

各遣使朝貢

是歲宋孝武帝孝建元年

大安元年春正月辛酉奉太武景穆神主於太廟樂平  
王拔有罪賜死二月癸未武昌王提薨三月己亥以太  
武景穆神主入太廟改元曲赦京師死囚已下夏六月  
壬戌詔名皇子弘曲赦癸酉詔尚書穆真等二十人巡  
行州郡觀察風俗大明賞罰

魏書載詔曰夫為治者因宜設官舉賢任職故上下

和平若官非其人姦邪在位則政教陵遲思明黜陟  
以隆治道今遣尚書穆伋真等二十人巡行州郡觀  
察風俗入其境農不墾殖田畝多荒則徭役不時廢  
于力也耆老飯蔬食少壯無衣褐則聚斂煩數匱于  
財也閭里空虛民多流散則綏導無方疎于恩也盜  
賊公行剽奪不息則恩禁不設失于刑也衆謗並興  
大少嗟怨善人隱伏奸邪當途則為法混淆昏于政  
也請如此比黜而戮之善為政者褒而賞之其阿枉

不能自申聽詣使者告狀若信清能衆所稱美誣告以求直反其罪使者受財斷察不平聽詣公車上訴其不孝父母不敬長上為吏奸暴及為盜賊各具以名上容隱者以所匿之罪罪之

冬十月庚午以遼西公常英為太宰進爵為王是歲遮逸波斯踈勒等國各遣使朝貢

二年春正月乙卯立皇后馮氏二月丁巳立皇子弘為皇太子太赦夏六月羽林中郎于判元提等謀逆伏誅

秋八月田于河西平西將軍漁陽公尉眷北擊伊吾尅其城大獲而還九月辛巳進河東公閭毗零落公閭紇爵並為王冬十月甲申車駕還宮甲午曲赦京師十一月改封西平王源賀隴西王噉達普嵐等國各遣使朝貢

三月春正月壬戌畋于崢山戊辰車駕還宮徵漁陽公尉眷拜太尉進爵為王錄尚書事夏五月庚申畋于松山巳巳還宮封皇弟新成為陽平王六月癸卯行幸陰



山秋八月田于陰山之北己亥還宮冬十月將東巡詔  
太宰常英起行宮于遼西黃山十二月州鎮五蝗百姓  
饑使開倉賑給之是歲粟特于闐扶餘五十餘國並遣  
使朝貢

是歲宋大明元年

四年春正月丙午初設酒禁

魏書刑罰志曰帝以士民多因酒致闕及議國政故  
禁之吉凶之會聽開禁有程日又增置內外候官伺

察諸曹及州鎮或微服雜府寺間求百官過失有司窮治訊掠取服百官賊過二丈皆斬又增律七十九章

乙卯行幸廣甯溫泉宮遂東巡庚午至遼西黃山宮遊宴數日親對高年問勞疾苦二月丙子登碣石山觀滄海大饗羣臣于山上班賞進爵各有差改碣石山為樂遊山築壇記行于海濱戊寅南幸信都田于廣川三月丁未觀馬射于中山所過郡國賜復一年丙辰車駕還

宮起太掖殿乙丑東平王陸侯薨夏六月壬戌詔曰比  
年以來雜調減省而所在州郡咸有逋懸非在職之官  
綏蕙失所貪穢過度誰使之然自今常調不充人不安  
業宰民之徒加以死罪六月丙申田于松山秋七月庚  
午行幸河西九月丁巳還宮辛亥太華殿成丙寅饗羣  
臣大赦冬十月甲戌北巡至陰山有故冢毀廢詔曰昔  
姬文葬枯骨天下歸仁自今有穿墳壠者斬之辛卯次  
于車輪山累石記行十一月車駕渡漠柔然絕迹遠遁

十二月中山王託真薨

五年春二月己酉司空河南公伊弼卒三月庚寅曲赦  
京師死罪已下夏四月乙巳封皇弟子推為京兆王五  
月常居國遣使朝貢六月戊申行幸陰山秋八月庚戌  
遂幸雲中壬戌還宮九月戊辰

魏書載詔曰夫褒賞必于有功刑罰審于有罪此由  
來常式牧守蒞民侵食百姓王賦不充雖歲滿去職  
應計前逋正其刑罪而主者失于督察不加彈正使

有罪者優游獲免無罪者妄受其辜是故啟奸邪之  
路長貪暴之心豈所謂原情處罪以正天下自今諸  
遷代者仰列在職殿最累制治罪克舉者加之爵寵  
有愆者肆之刑戮使能否殊貫刑賞不差主者明為  
條制以為常楷

儀同三司敦煌公李寶卒冬十二月戊申詔以六鎮雲  
中高平二雍秦州徧遇災旱年穀不收開倉廩賑之有  
徙流者諭以桑梓

和平元年春正月甲子朔大赦改元庚午詔散騎侍郎  
馮闡使于宋夏四月戊戌皇太后常氏殂于壽安宮五  
月癸酉葬昭太后于廣甯鳴鷄山六月甲午詔征西大  
將軍陽平王新城等討吐谷渾什寅崔浩之誅也史官  
遂廢至是復置秋七月西征諸軍至西平什寅走保南  
山九月庚申朔日有蝕之是月諸軍濟河追什寅遇瘴  
氣多病疫乃引還庚午車駕還宮冬十月居常王獻馴  
象三十一月詔散騎侍郎盧度世使于宋

二年春正月乙酉詔曰刺史牧民為萬里之表自頃每  
因發調逼人假貸大商富賈要射時利上下通同分以  
潤屋為政之弊莫過于此其一切禁絕犯者十尺以上  
皆死布告天下咸令知禁二月行幸中山遂幸信都三  
月宋人來聘車駕所過皆親對高年問疾苦詔年八十  
一子不從役靈邱南有山高百餘丈乃詔羣臣仰射山  
峯無能喻者帝彎弧發矢出三十餘丈過山南二百二  
十步遂刊石勒銘

此即水經注所載太武射廣昌嶺一事而誤為文成耶

是月發并肆州五千餘人修河西獵道辛巳車駕還宮  
夏四月乙未河東王閭毗薨五月癸未詔南部尚書黃  
盧頭李敷業考課諸州秋七月戊寅封皇弟小新成為  
濟陰王天賜為汝陰王萬壽為樂良王洛侯為廣平王  
八月波斯國遣使朝貢冬十月詔假員外散騎常侍游  
明根使於宋廣平王洛侯薨



三年春正月壬午以東郡公乙渾為太原王癸未樂良  
王萬壽薨二月壬子朔日有蝕之癸酉田於崞山遂觀  
漁於旋鴻池三月甲申宋人來聘高麗從王契噉思厭  
於師疏勒石那悉居半渴盤陀等國並遣使朝貢夏六  
月庚申行幸陰山秋七月壬寅幸河西九月壬辰常山  
王素薨冬十月詔員外散騎常侍游明根使于宋十一  
月壬寅車駕還宮十二月乙卯制戰陣之法十有餘條  
因大讐曜兵有飛龍騰蛇魚麗之變以示威武戊午零

陵王閭拔薨

四年春三月乙未賜京師民年七十以上大官厨食以  
終其年皇子胡人薨追封樂陵王乙巳詔諸州鎮守宰  
有擅召役兵民逼雇不程皆論同枉法夏四月癸亥帝  
幸西苑親射虎三頭五月壬辰侍中漁陽王尉眷薨壬  
寅行幸陰山秋七月壬午詔曰朕每歲閒月命羣臣講  
武所幸之處必立宮壇糜費勞損宜仍舊貫何必改作  
八月丙寅遂田于河西詔從官畋獵不得濫殺壬申詔

以饑食賣鬻兒女者盡還其家違者以掠人論九月辛  
巳車駕還宮冬十月以定相二州霽霜傷稼免其田租  
詔員外散騎常侍游明根使于宋十二月辛丑詔以喪  
葬嫁娶大禮未備致貴勢豪富越度奢靡命有司為之  
條格使貴賤有章上下咸序著之於令壬寅詔曰婚姻  
人道之始比者以來貴門多不率法或貪利財賂或因  
緣私好在于苟合無所擇選塵穢清化虧損人倫將何  
以宣示典謨垂之來裔今制皇族王公師傅侯伯及士

庶人之家不與百工伎巧卑姓為婚犯者加罪

五年春正月丁亥封皇弟雲為任城王二月詔以州鎮  
十四去歲蟲水開倉賑恤夏四月癸卯進封頓邱公李  
陵為王閏月戊子帝以旱故減膳責身是夜澍雨大降  
五月宋孝武帝殂六月丁亥行幸陰山秋七月壬寅行  
幸河西九月辛丑車駕還宮冬十月琅邪侯司馬楚之  
卒十二月南秦王楊難當卒吐呼羅國遣使朝貢  
六年春正月丙申大赦二月丁丑行幸樓煩宮高麗荻

王對曼等國各遣使朝貢三月戊戌相州刺史西平王  
王吐谷渾權卒乙巳車駕還宮夏四月破洛鄆國獻汗  
血馬普嵐國獻寶劍五月癸卯帝崩于大華殿時年二  
十六六月丙寅奉謚曰文成皇帝廟號高宗八月葬雲  
中金陵

魏書食貨志曰高宗以常賦外雜調十五頗為煩重  
將除之尚書毛法仁以為此軍國資用不可罷帝曰  
使地利無窮民力不竭吾孰與不足遂免之未幾復

調如前至顯宗時乃罷

顯祖獻文皇帝諱弘文成皇帝長子母曰李貴人興光  
元年七月生于陰山北大安二年二月立為皇太子和  
平六年五月甲辰即皇帝位大赦尊皇后曰皇太后車  
騎大將軍乙渾矯詔殺尚書楊保年等于禁中又殺司  
徒公平原王陸麗已酉以渾為太尉錄尚書事以東安  
王劉尼為司徒尚書左僕射和其奴為司空六月封繁  
陽侯李疑為丹陽王征東大將軍馮熙為昌黎王

魏書載乙丑詔曰夫賦斂煩則民財匱課調輕則用  
不足先朝權其輕重以惠百姓朕承洪業夙興待旦  
惟民之恤欲令天下同于逸豫而徭賦不息將何以  
塞煩去苛拯濟黎元令兵革不起畜積有餘諸有雜  
調一以與民

秋七月癸巳以太尉乙渾為丞相九月庚子曲赦京師  
丙午詔曰先朝以州牧親民宜置良佐故勅有司班九  
條之制使前政選吏以待後人然牧司舉非其人僭于

典度今制刺史守宰到官之日仰自舉人望忠信以為  
選官不論前政共相平置若簡任失所以罔上論是月  
宋義陽王劉昶自彭城來奔冬十月徵陽平王新成京  
兆王子推濟陽王小新成汝陰王天賜任城王雲入朝  
十一月宋湘東王或殺其主子業而自立

是歲宋王子業景和元年又明帝泰始元年

天安元年春正月己丑朔大赦改元二月庚申丞相太  
原王乙渾謀反伏誅乙亥以待中元孔雀為濮陽王侍



中陸定國為東郡王三月庚子以隴西王源賀為太尉  
辛丑高宗文成皇帝神主祔于神廟辛亥帝幸道壇親  
受符籙曲赦京師秋七月己酉初立鄉學郡置博士二  
人助教二人學生六十人冬十二月皇弟安平王薨

冊府元龜載天安中起永寧寺構七級浮圖高三百  
餘尺博敞為天下第一又於天宮寺造釋迦立像高  
四十三尺用赤金十萬斤 愚按永寧寺不始于胡  
太后獻文已先之矣

是歲州鎮十一旱民饑開倉賑恤

皇興元年春正月癸巳鎮南大將軍尉元大破宋將張  
永沈攸之於呂梁東宋人來聘庾子東平王道符謀反  
於長安其司馬段太陽斬之傳首京師道符兄弟皆伏  
誅閏月以頓邱王李峻為太宰二月濟陰王小新成薨  
宋東平太守申纂戍無鹽遇絕王使詔征南大將軍慕  
容白曜督諸軍往討三月甲寅尅之秋八月丁酉幸武  
州山石窟寺戊申皇子宏生大赦改元九月己巳進馮

胡公李白為梁郡王冬十月己亥朔日有蝕之是月詔  
賜六鎮賁人布人三匹癸卯田于那男洹濮陽王孔雀  
坐怠慢降為公是歲高麗庫莫奚具伏弗都羽陵日連  
匹黎爾于闐普嵐粟特國各遣使朝貢

二年春二月癸未田于西山親射虎豹三月慕容白曜  
進圍東陽戊午宋人來聘夏四月丙子朔日有蝕之辛  
丑進南郡公李爵爵為王五月乙卯田于崢山遂幸繁  
峙辛酉車駕還宮六月庚辰以河南關地曲赦京師殊

死以下以昌黎王馮熙為太傅秋九月辛亥封皇叔禎  
為南安王長壽為城陽王太洛為章武王休為安定王  
冬十月癸酉朔日有蝕之辛丑田于冷泉十一月州鎮  
二十七水旱詔開倉賑恤十二月甲午詔曰頃張永敢  
拒王威暴骨原隰天下之人一也其永軍殘廢之士聽  
還江南露骸草莽者勅州縣瘞之

冊府元龜載是年青徐平遣官至兗州以太牢祭孔  
子

是歲高麗庫莫奚契丹于闐波斯等國並遣使朝貢  
三年春正月乙丑東陽漬金沈文秀

宋書索虜傳載魏詔曰荆吳僭傲跨時一方篡戮發  
於蕭牆毒害嬰於羣庶徐州刺史薛安都司州刺史  
常珍奇深體逆順歸誠獻疑遭難已久饑饉荐臻或  
以餬口之功私力竊盜或不識王命蔽竄山數或為  
囚徒先被執繫元元之命甚可哀愍其曲赦淮北三  
州之民自天安二年正月三十日壬寅昧爽以前諸

犯死罪以下除逆惡不赦外餘繫囚見徒一切原遣  
若亡命山澤百日不首復其初罪今陽春之初東作  
方興三州之民各安其業以就農桑有饑窮不自存  
通其市糶之路鎮統之主勤加慰納遵用輕典以莅  
新化若綏蕩失中令民逃亡加罪無縱其普宣下使  
知朕意

戊辰司空平昌公和其奴卒二月己卯進上黨公慕容  
白曜爵為濟南王夏四月壬辰宋人來聘丙申名皇子

金史卷八十八  
宏大赦丁酉田于崞山五月徙清齊民于京師六月辛  
未立皇子宏為皇太子冬十冬丁酉朔日有蝕之是月  
太宰頓邱王李峻薨十一月進襄城公韓頽爵為王  
四年春正月州鎮大饑詔開倉賑恤二月以東郡王陸  
定國為司空詔征西大將軍上黨王長孫觀討吐谷渾  
什寅廣陽王石侯薨三月丙戌詔天下民病者所在官  
司遣醫就家診視所須藥任醫所量給之

冊府元龜載詔曰朕思民病苦明發不寐疚深疾首

是以廣集良醫遠採名藥欲救護兆庶可宣告天下  
夏四月辛丑大赦戊申長孫觀軍至曼頭山大破什寅  
五月封皇弟長樂為建昌王六月宋人來聘秋八月柔  
然犯塞九月丙寅車駕北伐諸將俱會于女水大破虜  
軍司徒東安公劉尼坐事免壬申車駕至自北伐飲至  
策勛告于宗廟冬十月殺濟南王慕容白曜誅高平公  
李敷十一月詔弛山澤禁十二月甲辰幸鹿野苑石窟  
寺陽平王新成薨是歲高麗庫莫奚契丹國遣使朝貢



五年春二月乙亥詔假員外散騎常侍邢祐使于宋夏  
四月北平王長孫敦薨六月丁未行幸河西秋七月丙  
寅遂至陰山八月丁亥車駕還宮帝幼而神武聰睿機  
悟有濟人之規仁孝純至禮敬師友及即位雅薄時務  
常有遺世之心欲禪位於叔父京兆王子雅羣臣固請  
乃止丙午使太保建安王陸馥太尉源賀奉皇帝璽綬  
冊命皇太子升帝位

魏書天象志曰上迫于太后傳位太子與此不同

愚按此卷既非魏收原本恐亦唐人傳聞之訛 魏  
書載冊命曰昔堯舜禪天下皆由其子不肖若丹朱  
商均能負荷者豈搜揚仄陋而授之哉爾雖冲幼有  
君人之表必能恢隆王道以濟兆民今使太尉建安  
王陸馥太尉源賀持節奉皇帝璽綬致位爾躬踐  
升帝位克廣洪業以光祖宗之烈使朕優游履道頤  
神養性可不善歟丁未詔曰朕希心玄古志存淡泊  
躬覽萬務則損頤神之和一日或曠政有淹滯之失

但子有天下歸尊於父父有天下傳之于子今稽協  
靈運考會羣心爰命儲宮踐昇大位朕優游恭已栖  
心浩然社稷乂安不亦善乎百官有司其祇奉脣子  
以答天休宣布寓內咸使聞悉讀此方知後人所補  
魏志云迫于太后者非

於是羣公奏上尊號太上皇帝

魏書載羣公奏曰昔三皇之初淡泊無為故稱皇是  
以漢高祖既稱皇帝尊其父曰太上皇明不統天下

今皇帝幼冲萬幾大政猶宜陛下總之謹上尊號乃從之

已酉上皇從御崇光宮采椽不斷土階而已國之大事咸以聞承明元年文明太后憾帝暴崩于永安殿

魏書馮太后傳曰文顯祖暴崩人言太后為之通

鑑考異曰元行冲後魏典載太后伏壯士于禁中太  
上入謁遂崩按事若如此安得不彰而中外恬然不  
以為怪又孝文終不之知 按後魏書及北史皆無

殺事而天象志云獻文暴崩實有鴆毒之禍今從之  
愚謂當作疑案

年二十三上謚曰獻文皇帝廟號顯祖葬雲中金陵  
魏書顯祖傳位高祖猶躬覽萬幾刑政嚴明顯潔汰  
貪牧守清廉往往有聞末年尤重刑罰言及常用惻  
愴每獄案必令覆鞠諸囚繫或積年不斷羣臣頗以  
為言帝曰獄滯雖非治體猶愈倉卒而濫夫人憂勞  
則思善故囹圄與福堂同居朕欲其改悔加以輕恕

耳由是囚繫雖淹刑多得所又以赦屢下則狂愚多  
微倖故自延興終于季年不復下赦理官鞫囚杖限  
五十有司欲免之則以細捶欲陷之則先大杖民多  
誣引或絕命杖下帝乃為之制其捶用荆平其節訊  
囚者其本大三分杖背者二分撻脛者一分拷悉依  
令皆從輕簡魏書食貨志曰顯祖即位躬行儉素率  
先公卿思賑益黎庶天安皇興間歲頻大旱又用兵  
南方民勤于征戍轉運帝深以為念遂因民貧富為

租輸三等九品之制千里內納粟千里外納米上三品入京中三品入他州要倉下三品入本州 魏書  
禮志曰顯祖禪位之二年有司奏天地五郊社稷已下及諸神合一千七十五所歲用牲七萬五千五百  
帝深愍生命乃詔曰夫神聰明正直享德與信何必  
在牲苟誠感有著雖行潦菜羹可致大報何必多殺  
方獲祉福其命有司非郊天地宗廟社稷之祀皆無  
用牲于是悉用酒脯

論曰太武聰明雄斷威靈傑立藉二世之資奮征伐之  
氣遂戎軒四出周旋夷險平秦隴掃統萬剪遼海蕩河  
源南夷荷擔北蠕絕迹廓定四表混一華戎其為武功  
也大矣遂使有魏之業光邁百王豈非神叡經綸事當  
命世至于初則東儲不終末乃疊成所忽固本貽防殆  
弗思乎文成屬太武後內頗虛耗既而國釁時艱朝野  
楚楚帝與時消息靜以鎮之養威布德懷緝中外自非  
機悟深裕矜濟為心何能若此可謂有君人之度矣獻



文聰敵夙成兼資雄斷故能更清漠野大啟南服而早  
有厭世之心終致宮闈之變將天意也

南北史合注卷八十八